

UMJESTO PREDGOVORA

Sport je, nema sumnje, "čudo" XX. vijeka i savremenog društva, fenomen i pojava koja igra veoma veliku ulogu kako u svakodnevnom životu čovjeka, tako i u "životu" svake manje ili više razvijenije društvene zajednice. Svojim čarima, lepršavošću, svojom mladošću i ljepotom, sport okuplja milione ljudi. Slobodno možemo reći da sport ima više pristalica nego bilo koja politička partija ili religija našeg doba i ovog svijeta. Veoma je veliki broj onih koje sport okuplja kako na Istoku i Zapadu, tako i na Sjeveru i Jugu naše Planete. U njemu ljudi traže kako relaksaciju, odmor i zabavu, simboliku i moć, rasonodu i zadovoljstvo, tako i osnovu za agresiju i militantnost. Upravo, zato se sport i smatra najvažnijim političkim i kulturnim fenomenom našeg vremena.

Ali, sport danas, odnosno današnji sport, nije više "onaj stari", "dobri" sport kao što je to nekada bio kada nije bio prožet ideologijom ili politikom, agresijom i nasiljem. U njega su danas prodrle neka druga iskustva nošena duhom industrijalizma, birokratizma i komercijalizma, militarizma i imperijalizma, dominacije i manipulacije. Nekada su se sportom bavili ljudi iz ljubavi i zadovoljstva: sport ih je oplemenjivao, nadahnjivao i ispunjavao filantropijom, dobrotom, plemenitošću i pažljivošću. Danas je sport nešto drugo, jer je romantično doba ustupilo mjesto nekom drugom i čudnom vremenu u kojem više nije "važno učestvovati" već pobijediti, u kojem su ljudi opterećeni imperativom pobjede "po svaku cijenu", a" i korištenjem svih mogućih sredstava.